

KULIAH USTAZ HJ ALI HJ MOHAMAD

5 September 2001, jam 2330 - 6 September 2001, jam 0230

Iringan Zikir & Solawat

DI MASJID mana jua akan ada keberkahan Allah SWT selagi dua perkara dilaksanakan, iaitu pertama pelbagai amalan zikr (solat, membaca Quran, wiridan dan sebagainya) dan kedua, adanya amalan solawat (misalnya Dibai'e atau sekadar bermarhaban).

Apabila dua kegiatan asas dalam ruang solat ini dilaksanakan, maka kita akan merasa ketenteraman dalam sesebuah masjid. Ketenteraman ini bukan saja kerana suasana tenang di dalamnya walaupun masjid itu berada di kawasan sibuk seperti di tengah bandar, tetapi yang utama ialah rasa tenang dalam jiwa jemaah atau pengunjung yang bersolat atau berada dalam jangka masa tertentu (beriktikaf) di dalam masjid tadi.

Zikr dan solawat mempunyai semacam rentak atau ritme (rhythm) yang menenangkan jiwa dan membuka hati insan kepada alam rohani. Konsep rentak ini bak denyutan yang memenuhi alam.

Dalam alam rahim, si bayi didodoikan oleh denyutan nadi ibunya. Tetapi apakah rentak nadi ibunya itu tidak tenang, ia akan membawa reaksi kepada si bayi. Muzik juga mempunyai rentak yang menenangkan atau menimbulkan gejolak perasaan.

Tetapi zikr dan solawat merupakan suatu 'fitrah' iaitu unsur semula jadi yang berasal daripada Allah SWT. Dialah yang menciptakan seluruh alam dan menentukan rentak dalam pergerakan cakerawala, angin, ombak sehinggalah pada setiap ciptaannya. Sesungguhnya setiap ciptaan Allah SWT itu berzikr. Dalam atom iaitu unit terkecil yang juga disebut 'zarah' (dalam bahasa Quran) ada zikrnya iaitu pada pergerakan atau harakah elektron.

Rohani kita merupakan unsur ghaib. Keimanan atau rukun Iman merupakan kepercayaan kita kepada hal-hal ghaib iaitu yang terlihat dan terjangkau oleh deria kita.

Namun maha suci Allah SWT, Dia telah memberikan manusia roh (roh rabbani, sila lihat kuliah-kuliah sebelumnya). Sesungguhnya manusia merupakan ciptaan Allah SWT yang sebaik-baiknya.

Alam ghaib dapat dianggap sebagai satu dimensi tidak ketara yang dekat dengan hakikat atau realiti kehidupan. Apabila seseorang Islam banyak melaksanakan zikr dan solawat, dimensi ini akan lebih mendekatinya. Jiwanya akan merasa akrab (taqarrub) kepada dimensi yang membawanya dalam perjalanan menuju Penciptanya. Inilah teras habluminallah).

Hati merupakan pintu yang akan membuka jalan ke arah alam roh. Zikr dan solawat bak kunci pembuka hati atau dalam istilah tasawufnya, *miftahus-sudur*.

Namun sebelum menuju perjalanan tadi, ada beberapa syarat yang perlu dipenuhi.

SYARAT PERJALANAN

PERTAMA-TAMA seseorang itu hendaklah membebaskan dirinya daripada belenggu kebendaan sebagai prasyarat sebelum memulakan kembara menuju jalan Allah SWT.

Sesungguhnya hidup di dunia memerlukan kebendaan - makan minum, pakaian, tempat tinggal dan sebagainya. Namun ini semua adalah keperluan untuk hidup dan BUKAN tujuan hidup. Quran menggalakkan orang Islam berlumba dan bersaing (*sabbiqus* dan *sari'u*) ke arah kecemerlangan dalam mencari kekayaan dan ilmu selepas menunaikan suruhan Allah SWT. Namun, tujuan setiap makhluk hidup kerana hendak mengabdikan diri kepada Allah SWT.

Apabila kita menolak ketaksuban terhadap kebendaan dan tujuan hidup kita ditujukan kepada dan untuk Allah SWT, fikiran kita akan terhala kepada-Nya.

Inilah teras zikr iaitu mengingati-Nya dalam setiap detik dan helaan nafas. Hati akan merasa lazat atau nikmat kerana mendekati Allah SWT. Apabila ini berlaku roh dan jasmani manusia menjadi lebih mesra dan begitu juga dengan reaksinya terhadap alam.

Sekadar contoh, kita menikmati indahnya sinaran bulan purnama, tiupan bayu, sinar suria dan kicauan unggas. Nikmat ini disampaikan menerusi deria (mata, telinga, bau, rasa dan sentuh) dan tertancap dalam otak kita. Namun nikmat yang lebih besar ialah apabila kehadiran unsur-unsur menyelina dalam jiwa kita atau rohani. Hasilnya deria dalam jiwa atau roh kita yang dipanggil *bashirah* akan hidup.

Apabila bashirah hidup, keindahan unsur-unsur alam tadi tidak dilihat sekadar indah pada luarannya, tetapi betapa indahnya Pencipta-nya. Keindahan Pencipta merupakan sebesar-besar nikmat yang diperolehi oleh yang dicipta iaitu manusia.

Peranan bashirah dalam hal ini bak persamaan matematik:

$Bashirah = f(\text{deria, hati, rahsia hati})$.

Keindahan Allah SWT dalam dua bentuk yang disebut dalam *asma-ul-husna* (nama-nama agung Allah) yang kesemuanya 99 yang tercatat dalam al-Quran. Dua daripada sifat tadi yang merujuk kepada keindahan ialah *Jamal* dan *Jalal*.

Jamal bermakna indah; sedangkan *Jalal* bererti agung. Manusia boleh bersifat **jamal** dengan berpakaian indah, bersopan santun yang indah, suka pada kesenian yang dibolehkan Islam dan sebagainya. [Namun manusia tidak boleh bersifat **jalal** kerana ia merupakan sifat Rubbubiyah. Bab ini akan dijelaskan dalam kuliah selanjutnya, insya-Allah.]

[Catatan] Berfikir merupakan salah satu ciri kebijaksanaan atau cendekia. Pengasas falsafah moden Barat, Rene Descartes, berkata '*cogito ergo sum*' (Bahasa Latin yang bermaksud: Aku berfikir maka aku wujud/hidup). Namun

pemikiran Descartes bersifat keperluan dunia dan terputus daripada hala tuju Ilahi.]

Manusia Islam adalah insan pasrah yang berfikir atau berakal. Sesungguhnya 'berakal' adalah salah satu syarat bagi melaksanakan rukun Islam (syariat). Hayatilah maksud firman Allah SWT [maksud ayat ini antara lain pernah membuat Nabi Muhammad saw menangis tersedu-sedu:

“Sesungguhnya pada di sebalik kejadian tujuh petala langit dan bumi dan peredaran siang dan malam itu ada tanda-tanda kebesaran dan keagungan Allah bagi mereka yang boleh berfikir.”

Maksud ‘mereka yang boleh berfikir’ ialah dari frasa Arab: *ulil-al-bab*. Kekata dasar Arab yang digunakan di sini bukan ‘*bab*’ yang bererti pintu atau gerbang. Sebaliknya, yang dimaksudkan ialah ‘*lub*’ yang membawa maksud ‘lubuk jiwa’ atau rahsia hati yang seiras dengan istilah yang amat sering digunakan dalam tasawuf iaitu, ‘*sirr*’.

Dalam ayat tadi yang sering dibahaskan oleh para ulama tasawuf, antara lain ada dua makna yang tercerna:

- ❑ Sistem alam manusia atau dipanggil ‘sistem suria’ yang diaturkan begitu rupa sehingga cakerawala tidak melanggar, siang dan malam berlaku akibat gerakan cakerawala. Ini semua diatur oleh Allah SWT atau dipanggil *sunatullah*.
- ❑ Yang lebih menarik perhatian para ulama tasawuf ialah peranan golongan berfikir iaitu yang akalnya cuba meneroka rahsia ciptaan Allah termasuk hukum graviti, peredaran cakerawala dan sebagainya sambil terus berzikir kepada-Nya.

Selepas ayat tadi, sambungannya pula Allah SWT menyatakan dengan maksud bahawa golongan berfikir ini “berzikir semasa berdiri, rukuk dan baring”. Sebenarnya kekata yang digunakan penuh perlambangan dan tidak dapat dihuraikan sekali gus di sini, tetapi yang nyata insan yang berakal itu hendaklah berfikir dalam rangka meneroka ilmu Allah SWT, menilai keajaiban

ciptaan-Nya. Sebagai khalifah (pengurus bumi), ia hendaklah menggunakan ilmu sebagai amanah tadi demi kebaikan semua ciptaan-Nya.

MENAKLUKI ROHANI

MENAKLUKI rohani merupakan satu pencapaian penting seorang pengamal tasauf. Pencapaian ini berlaku selepas melalui perjalanan rohani yang amat sukar lagi perih. Hati mesti ditakluki dalam setiap detik dan keadaan. Hanya dengan cara inilah insan dapat mengatasi sifat tabii atau semula jadinya iaitu 'lupa dan lalai' .

Tanpa 'lalai dan lupa', seseorang dapat melaksanakan suruhan dan larangan Allah SWT atau diistilahkan dalam kalimat Quran, *ammar maaruf nahi munkar*.

Ammar maaruf atau perbuatan baik lebih mudah dilakukan berbanding dengan *nahi munkar*. Ini disebabkan perbuatan serong berlaku tanpa disedari kerana adanya unsur lupa menyelinap pada hati atau akal manusia. Keadaan ini dipanggil 'ingatan tidak mendalam'

[**Catatan** Dalam ilmu jiwa atau psikologi, ingatan dianggap kesedaran atau *consciousness*. Manusia berada dalam keadaan sedar (*conscious*), bawah sedar (*sub-conscious*) atau tidak sedar (*unconscious*).]

Contoh: Apabila lampu trafik memancarkan warna merah, kenderaan berhenti. Apatah lagi jika kamera trafik terpasang. Pemandu menyedari ada undang-undang jalan raya dan ada pula 'mata' memerhatikan, jadi ia menghentikan kereta.

Pada hal, sebagai Muslim, kita sedar bahawa kita senantiasa diperhatikan Allah SWT dan para malaikatnya yang membuat catatan amal baik dan buruk kita. Namun kebanyakan manusia 'lupa' akan hakikat ini.

Teras tasauf adalah ihsan yang didefinisikan oleh Rasulullah saw dalam sebuah hadis terkenal -- *ihsan ialah seolah-olah kita melihat Allah SWT dan jika tidak dapat berbuat demikian, kita tahu Allah melihat kita. Inilah juga yang dimaksudkan dengan melihat menggunakan mata hati atau bashirah.*

Kerana ihsanlah, maka kalangan ahli sufi menyebut bahawa ia tidak melihat di kanan, kiri, atas dan bawah sisinya selain daripada Allah SWT.

PERATURAN ALLAH SWT

Dalam soal undang-undang manusia, senantiasa ada lubang untuk dibolosi (loopholes) sehingga peguam yang licik dapat melepaskan penjenayah seperti dalam cerita mafia di Amerika Syarikat.

Sebaliknya terjadi dengan undang-undang Allah SWT. Tiada satu makhluk pun yang terlepas daripada proses keadilan-Nya pada akhirat. Saksi manusia bukan saja terdiri daripada para malaikat yang mencatat kebaikan dan keburukannya, bahkan kulit dan anggotanya dapat berkata-kata untuk mengesahkan atau menafikan dapatan yang sudah dirakamkan.

Tiada cacat dan cela pada undang-undang Allah SWT berbanding dengan undang-undang manusia yang senantiasa berubah-ubah.

Sesungguhnya manusia tidak sunyi daripada berbuat kesilapan kepada Penciptanya. Demi mensucikan diri, Allah SWT mengizinkan manusia bertaubat (kembali kepada-Nya) dan memohon keampunan-Nya (*istighfar*). Oleh itu, ciri manusia yang berfikir ialah merenungi kesilapannya dan segera membetulkan diri.

Ganjaran bagi *ulil albab* ialah *makrifatullah* atau pengetahuan mengenai Allah. Sering hal ini dikaitkan dengan kononnya insan berfikir ini mempunyai kuasa untuk melihat keghaiban atau berinteraksi dengan benda-benda ghaib.

Dapat melihat benda ghaib hanyalah suatu pemberian daripada Allah SWT. Hal ini berlaku kepada sesiapa saja menurut pilihan Allah. Hal ini tiada guna dibahaskan kerana Allah SWT bebas memilih makhluknya.

Satu lagi perkara yang perlu dihindarkan ialah tanggapan (*notion*) bahawa makrifat adalah ilmu perkara-perkara pelik. Orang yang bertasauf kononnya menghadap sangat akan ilmu sedemikian. Pada hal jika ahli tasauf

mendambakan sedemikian, ia tidak lagi *ikhlas*. Walhal, ikhlas merupakan sifat utama untuk mengenal Allah SWT.

Jadi, dapat disimpulkan makrifat ialah imbalan kepada ulil albab. Mengetahui hubungan makhluk dan Khaliknya merupakan satu ilmu yang tiada ternilai.

Proses makrifat akan membuat seseorang menyedari bahawa dirinya fana' atau lebur bak debu-debu yang merupakan asal kejadian manusia pertama.

Lihat sajalah taburan bintang pada malam yang cerah. Semua cakerawala yang bernyala (dipanggil bintang) bertaburan seperti debu. Bandingkan saiz bintang yang begitu besar berbanding dengan bumi, apatah lagi dengan diri kita. Nyatalah pada Penglihatan Khalik, kita semua hanyalah debu-debu yang berterbangan.

Rasa lebur tadi membawa rasa lemah sehingga hilang segala daya upaya. Tingkat rasa (maqam) ini disebut *haqaulah* (dari kalimat yang dizikirkan iaitu *lahaula wala quwwata illah billah*)

Rasa lemah mengecilkan manusia, dan jadilah ia insan dhaif (manusia kerdil -- serba kekurangan dan kelemahan) apabila melihat jalinan hubungannya dengan Penciptanya.

Terdapat ungkapan sufi yang menceritakan ironi kelemahan tadi:

Lemah di sisi Allah

Diberkati-Nya dengan kekuatan

Takbur di sisi Allah

Dilimpahi-Nya dengan kelemahan

Ungkapan ini menceritakan rahsia atau *lub* pada diri *ulil albab* sehinggalah Allah SWT jua yang menjaganya daripada kelalaian dan kealpaan. Tingkat ini dipanggil 'mahfuz' yang diberikan kepada manusia biasa (berbanding dengan ma'sum atau tingkat tanpa dosa yang diberikan Allah kepada para nabi-Nya.)

PELENGKAP ZIKR

SOLAWAT adalah kalimat cinta dan pujian yang ditujukan kepada Nabi Muhammad saw, manusia unggul yang diberikan gelar Kekasih Allah. Baginda merupakan makhluk paling mulia (*afdhalul makhlukat*) dan rahmat seluruh alam (*rahmatan lil 'alamin*) sehingga Allah SWT dan para malaikat-Nya bersolawat ke atas baginda. Quran menjelaskan bahawa Allah SWT memerintahkan orang beriman agar bersolawat kepada baginda.

Perintah solawat ini besar sekali ertinya. Solat merupakan penegak atau pendiri agama. Solat ialah hubungan tegak atau vertikal manusia dengan Penciptanya. Bahkan dalam solat, salah satu daripada lima rukun (perkara yang diwajibkan dan tidak sah solat tanpanya) ialah dengan bersolawat pada bahagian tasyahud sebelum salam pertama.

Pada hari kiamat, manusia meminta bantuan para rasul agar meminta Allah SWT melaksanakan perhitungan atau perkiraan, *Hisab*. Selepas Nabi Adam dan satu persatu nabi yang menolak untuk berbuat demikian, maka sampailah giliran manusia meminta Nabi Muhammad saw. Ternyata penutup nabi inilah yang berjaya diperkenankan oleh Allah SWT. Bantuan tadi dipanggil *syafa'at*.

Nabi Muhammad adalah 'pembantu' kepada umatnya. Oleh itu, solawat merupakan bantuan untuk menjadikan zikr lebih berkesan. Tegasnya, zikr dan solawat seiringan. Menyebut nama Muhammad dengan penuh hormat dan cinta kepadanya sudah merupakan sebahagian daripada solawat.

Kalimat zikir tertinggi ialah *lailaha illah* dan dilengkapi dengan *muhammad-ur-rasullah*.

Terdapat pelbagai solawat dari yang mudah sehingga kepada yang berupa doa panjang. Sesungguhnya pada solawat, terdapat kesan penawar atau penyembuh yang membantu manusia dalam dalam proses atau kembara mengenali Penciptanya.

SEKIAN
